

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-02738-2013
Broj akta: 01EH-001
Gračanica, 28. 08. 2013. godine

Z A P I S N I K
SA 10. SJEDNICE OPĆINSKOG VIJEĆA
GRAČANICA

Održane dana 26. 06. 2013. godine u sali za sjednice Općine Gračanica, sa početkom u 10.00 sati.

Početku sjednice prisustvovalo 27 članova Općinskog vijeća Gračanica. Odsutni su bili: Hasić Mujo, Tursunović Esad i Omerdić Mirza.

Sjednicu je zakazao i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i: Općinski načelnik Nusret Helić, općinski pravobranilac Jasminka Imširović, Azra Mustajbašić, šefovi službi za upravu Aida Hodžić, Senaida Šaković, Mustafa Bajić i Zijad Dedić, izvjestioci Džana Sokolović i Ljubica Petrović, predstavnik OSCE-a Tuzla Slobodanka Radić, predstavnik EUFOR-a Tuzla, te predstavnici sredstava informisanja.

Zapisnik sa 8. sjednice Općinskog vijeća Gračanica usvojen je jednoglasno sa 27 glasova "ZA".

Zapisnik sa 9. sjednice Općinskog vijeća Gračanica, koja je održana istog dana kad i 8. sjednica Vijeća, takođe je usvojen je jednoglasno sa 27 glasova "ZA".

Pitanja i inicijative kandidovali su:

Fadil Mešić:

"Ja imam dva vijećnička pitanja. Jedno je upućeno Općinskom načelniku, a drugo predsjedavajućem Općinskog vijeća. Prvo pitanje. Na potezu od Žitoprometa uzvodno prema Srednjoškolskom centru pojavili su se štakori. Više građana je prijavilo ovu pojavu, pa bih Vas zamolio gospodine načelnice da intervenišete, te preko Veterinarske stanice da se izvrši deratizacija, odnosno uništavanje štakora. Čak je i Zikrija Memić vodio borbu protiv štakora jer su putem kanalizacije došli čak do trećeg sprata u naselju Bazen. Najviše su uočljivi oko mosta kod Žitoprometa. I drugo vijećničko pitanje. Pod tačkom 4. je Informacija o inspekcijskom nadzoru, pa me interesuje je li ovo i odgovor na moje postavljeno vijećničko pitanje koje sam uputio Federalnoj upravi za inspekcije?"

Predsjedavajući Vijeća, Edin Ibrišević odgovorio je na postavljeno pitanje naglašavajući da je pitanje Mešića blagovremeno dostavljeno Federalnoj upravi za inspekcijske poslove od strane Stručne službe Općinskog vijeća, a da je 4. tačka dnevnog reda kandidovana po planiranom Programu rada Općinskog vijeća Gračanica za 2013. godinu.

Mirsad Čamdžić:

“Jedno vijećničko pitanje ili inicijativa prema Općinskom načelniku, kratko samo jedan podsjetnik.

- Šta se dešava sa budžetskim stavkama, izgradnja javnog wc-a i postavljanje bežičnog interneta u centru grada?

Obrazloženje: U budžetu su usvojene ove stavke u iznosu od 5 i 10 hiljada KM, međutim još ništa nije urađeno na realizaciji.”

Esma Pašić:

“Koristim priliku da se ovim putem zahvalim Općinskom načelniku na odgovoru na moje vijećničko pitanja koje sam postavila na IX sjednici Općinskog vijeća Gračanica, a odnosi se na asfaltiranje ulica. Ulica Muhameda Seida Mašića je asfaltirana, a drugo pitanje se odnosilo na asfaltiranje ulice Ritašići-Hajdarovac za koje nisu sredstva planirana budžetom u 2013. g., ali evo nadam se da će u narednoj godini sredstva biti planirana i da će se moći realizovati asfaltiranje navedenog putnog pravca.

Ja imam vijećničku inicijativu, ili pitanje, upućeno od strane Vijeća MZ-e Gračanica koje se odnosi na konstituisanje i početak rada komunalnog inspektora. U čiju nadležnost spada njihovo finansiranje, kada komunalni inspektor reaguje i koje su njegove nadležnosti?

Drugo pitanje se odnosi na zakon o održavanju i upravljanju stambenim zgradama.

Obrazloženje: Zgrade će se vremenom urušiti, stoga je potrebno odrediti upravitelja što prije kako bi se mogla prikupiti sredstva za održavanje i sanaciju stambenih zgrada i zajedničkih prostorija.”

Almedin Devedžić:

“Ja bih imao jednu inicijativu i jedan zahtjev prema načelniku općine Gračanica. Krenut ću sa inicijativom i nadam se da će načelnik iznaći mogućnost da se realizuje ovo što ću iznijeti.

- Inicijativa za poboljšanje statusa sporta i razvoja tjelesnog i zdravstveno odgoja za djecu i omladinu osnovnog i srednjoškolskog uzrasta. Uzimajući u obzir položaj i status sporta na općini Gračanica i shvatajući važnost tjelesnog i zdravstvenog odgoja u razvoju djece i omladine, obraćam Vam se s određenim konstatacijama i prijedlozima čiji je cilj unapređenje tjelesnog i zdravstvenog odgoja, odnosno sporta. Zbog teške materijalne situacije u javnim budžetima i fondovima iz kojih se finansira obrazovanje a samim tim i sport, i ove školske godine osnovne i srednje škole našle su se u veoma teškoj situaciji. U pitanje je došla realizacija planiranih sportskih aktivnosti, posebno takmičenja za učenike osnovnih škola. Zbog nedostatka sredstava, koja nažalost nisu ni planirana, u pitanje je došla organizacija svih sportskih takmičenja. Osnovne škole su prepuštene same sebi i svaka je na svoj način uspjela da organizuje ista. Nažalost sva planirana takmičenja nisu realizovana. Ističem veliku i značajnu ulogu Sportskog saveza Gračanica i njihovog velikog entuzijaste, borca za sport, dr. Osmana Bukvića koji je zahvaljujući svojoj viziji razvoja sporta na općini Gračanica uveliko doprinio da se planirana takmičenja i održe. Ovom prilikom pohvaljujem ovakve sportske radnike i pozivam nadležne institucije od Općine do Kantona, a i šire, da podrže aktivnosti ovakvih entuzijasta te da osim uglavnom verbalne podrške i materijalno podrže ovakve sportske projekte. U narednoj školskoj godini Aktiv direktora osnovnih škola općine Gračanica će u saradnji sa Sportskim savezom općine Gračanica i cijenjenim dr. Bukvićem odlučno i snažno istrajati na organizaciji i zahtjevima koji će promovirati i razvijati tjelesni i zdravstveni odgoj kao i sport, s ciljem pružanja osnovnih uslova za zdrav i normalan život djece i omladine. Nadamo se i uvjereni smo da će sve relevantne institucije snažnije i odlučnije podržati i finansijski pratiti ova nastojanja i pomoći našim nastavnicima i profesorima tjelesnog i zdravstvenog odgoja, koji sa svojim učenicima postižu vrhunske rezultate na takmičenjima širom BiH, da što uspješnije realizuju svoje odgojno-obrazovne zadatke i ovom veoma značajnom obliku rada konačno vrata položaj koji zaslužuje.

- Zahtjev za hitnu sanaciju puta Lukavica-Malešići.

Poštovani načelnice, obzirom da je u budžetu Općine Gračanica za 2013. godinu uvršten i projekat sanacije puta Lukavica-Malešići u visini od 10.000,00 KM koristim priliku da Vas pozovem da se planirane aktivnosti počnu realizovati. Pošto je pomenuti put jedina veza između Lukavice i Malešića, a koji vodi do velikog broja poljoprivrednih imanja koji su jedini izvor egzistencije većine stanovnika Lukavice, potrebno je hitno reagovati i postojeću dionicu puta od Lukavice do Malešića u

dužini od 3 km dovesti u prohodno stanje. Potrebno je prokopati zatrpane kanale, proširiti i okršiti postojeći put od velikog broja rastinja te isti nasuti posipnim materijalom. Napominjem da će se u ove aktivnosti uključiti MZ-a Lukavica i njeni građani kako bi se postojeći put osposobio i konačno razbila saobraćajna blokada prema Malešićima i centru općine. Nadamo se da ćete gospodine načelnice shvatiti važnost ovog puta koji velikom broju stanovnika Lukavice i život znači. S poštovanjem.”

Senad Selimović:

“Iskoristio bih ovu priliku da se zahvalim predsjedavajućem Općinskog vijeća Gračanica gosp. Edinu Ibriševiću na posjeti koju je obavio u MZ-i Trnovci i ovom prilikom pozivam i Općinskog načelnika gosp. Nusreta Helića da obiđe Trnovce i ostale mjesne zajednice na općini Gračanica. Imam dva vijećnička pitanja i upućujem oba Općinskom načelniku.

1. Prvo pitanje glasi:

Kojim danom u sedmici ili kojeg datuma u mjesecu načelnik može da razgovara sa općinskim vijenicima kao predstavnicima zakonodavne vlasti Općine Gračanica?

2. Sanacija mosta na ulazu u Trnovce:

Ponovo Vas pitam, kada možemo krenuti u sanaciju mosta? Već 4 mjeseca tražim da se krene u sanaciju mosta na ulazu u Trnovce. Most u Trnovcima bio je predviđen i Budžtom za 2012. godinu u iznosu od 10.000,00 KM i nije realizovan. A utrošeno je 6.521.000,00 KM na nivou Općine Gračanica u 2012. godini za određene projekte. Most je u Budžetu za 2013. godinu. Zar nisu prioriteti u 2013. godini projekti koji nisu bili realizovani u 2012. god. Već 4 mjeseca javno tražim da se krene u sanaciju mosta na ulazu u Trnovce. Niko ništa. Most povezuje tri mjesne zajednice i dvije općine. Most je u veoma kritičnom stanju, svakodnevno se obrušava i prijeti mu rušenje. Preko mosta svakodnevno saobraćaju vozila, prelazi autobus sa putnicima. Molim Boga da nikome ništa ne bude na tom mostu. I Vijeće MZ-e Trnovci je 29. 05. 2013. godine uputilo Zahtjev da se krene sa rekonstrukcijom mosta na ulazu u Trnovce. Projekat za most je urađen. Sada je sve na Vama. Zamolio bih Vas da nam pomognete. Hvala!!”

Hasan Fehratović:

“Imam jedno vijećničko pitanje prema Elektroprivredi BiH, Elektrodistribucija Tuzla.

U MZ-i Gornja Orahovica, zaseok Birkovac, na području TS “Ravkići” u jednom većem dijelu domaćinstava napon ima malu vrijednost i snižava se do vrijednosti 180 (v). Usljed toga dolazi do kvarova na uređajima i mašinama, a česti su slučajevi da pojedini uređaji uopšte ne mogu raditi. Zbog toga u ime građana pomenute podružnice, molim nadležne da izađu na teren, utvrde ove činjenice i nakon toga preduzmu odgovarajuće mjere i poboljšaju snabdijevanje električnom energijom podizanjem napona na standardni nivo.”

Edin Ibrišević:

“Evo i ja imam dvije inicijative i jedno vijećničko pitanje. Prvu inicijativu upućujem ka Policijskoj upravi Gračanica, a zamoljen sam od strane VMZ-e Miričina i svih građana. S obzirom da je u posljednje vrijeme u Miričini narušena bezbjedonosna situacija svih građana koja se manifestuje kroz trgovinu i konzumiranje narkotičkih sredstava, bjesomučnu vožnju motorima u kasnim satima. Zbog navedenih pojava tražim od Policijske uprave Gračanica da poveća kontrolu makar u večernjim satima, da svojim prisustvom na određen način stavi do znanja da i u Miričini postoji pravna država.

Drugu inicijativu upućujem prema općinskim vijećnicima, odnosno prenosim inicijativu Organizacije demobilisanih boraca. U svojoj inicijativi vezano za odlazak u Srebrenicu, to jest na “marš mira”, Organizacija demobilisanih boraca traži od vijećnika sukladno njihovim mogućnostima da potpomognu ovu akciju. Naglašavaju da je Općinski načelnik podržao organizaciju, obezbijedio jedan autobus. Takođe, da su i tri vijećnika već do sada podržali ovu akciju, pa mole i ostale vijećnike da u skladu sa svojim mogućnostima, evo danas u toku dana, prilože određena sredstva jer je veliki odaziv i veliki je broj zainteresovanih, a potrebna su im sredstva i za drugi autobus.

Na kraju pitanje koje upućujem Općinskom načelniku, a on dalje svojim službama, a glasi:

Ko je nadležan da sankcioniše građane koji se nelegalno priključuju na kanalizacionu mrežu u MZ-i Pribava? Toliko. Hvala.”

Zatvoreno je vrijeme predviđeno za pitanja i inicijative, te se prešlo na raspravu o predloženom dnevnom redu 10. sjednice Općinskog vijeća Gračanica.

Aida Hodžić, šef Službe za upravu u ime predlagača Općinskog načelnika, predložila je dopunu dnevnog reda sa Odlukom o promjeni statusa nepokretnosti u opštoj upotrebi i da se osma tačka proširi sa još jednim rješenjem. Predloženi materijal je već razmatrala Komisija za propise i Statut.

Prijedlog za dopunu dnevnog reda usvojen je jednoglasno kao i prijedlog za proširenje tačke 8. dnevnog reda. Pod tačkom 3. je Odluka o promjeni statusa nepokretnosti u opštoj upotrebi.

Dnevni red 10. sjednice Općinskog vijeća usvojen je jednoglasno sa 27 glasova "ZA" i glasi:

1. ODLUKA O BROJU I VISINI STIPENDIJA ZA UČENIKE SREDNJIH ŠKOLA I STUDENTE ZA ŠKOLSKU 2013/2014. GODINU
Izjavitelac: Senaida Šaković, šef Službe
2. ODLUKA O UTVRĐIVANJU USLOVA, KRITERIJA I POSTUPKA DODJELE STIPENDIJA UČENICIMA SREDNJIH ŠKOLA I STUDENTIMA
Izjavitelac: Senaida Šaković, šef Službe
3. ODLUKA O PROMJENI STATUSA NEPOKRETNOSTI U OPŠTOJ UPOTREBI
Izjavitelac: Aida Hodžić, šef Službe
4. IMENOVANJE POPISNE KOMISIJE OPĆINE GRAČANICA ZA POPIS STANOVNIŠTVA, DOMAĆINSTAVA I STANOVA U BiH 2013. GODINE
Izjavitelac: Senaida Šaković, predsjednik Konkursne komisije
5. INFORMACIJA O INSPEKCIJSKOM NADZORU IZ OBLASTI RADNIH ODNOSA SA BROJEM PREGLEDA I PODUZETIM MJERAMA KOD PRAVNIH I FIZIČKIH LICA NA PODRUČJU OPĆINE GRAČANICA U 2012. GODINI
Izjavitelac: predstavnik Kantonalne uprave za inspeksijske poslove Tuzla
6. PROGRAM KAPITALNIH INVESTICIJA OPĆINE GRAČANICA ZA PERIOD 2010.- 2014.GODINA - AŽURIRANJE U 2013. GODINI
Izjavitelac: Zijad Dedić, šef Službe
(Napomena: Zbog obimnosti materijal je dostavljen predsjednicima klubova)
7. IZVJEŠTAJ O REALIZACIJI PROGRAMA KAPITALNIH INVESTICIJA OPĆINE GRAČANICA U 2012. GOD.
Izjavitelac: Zijad Dedić, šef Službe
8. INFORMACIJA O STATUSU PROJEKTA „POBOLJŠANJE SISTEMA VODOSNABDIJEVANJA I PROŠIRENJA SISTEMA KANALIZACIONE MREŽE NA PODRUČJU OPĆINE GRAČANICA“ KANDIDOVANOG PRI EVROPSKOJ INVESTICIONOJ BANCI (EIB)
Izjavitelac: Džana Sokolović, savjetnik načelnika i koordinator projekta
9. RJEŠENJA I ZAKLJUČCI IMOVINSKO-PRAVNE SLUŽBE
Izjavitelac: Aida Hodžić, šef Službe

TAČKA 1:

ODLUKA O BROJU I VISINI STIPENDIJA ZA UČENIKE SREDNJIH ŠKOLA I STUDENTE ZA ŠKOLSKU 2013/2014. GODINU

Nije bilo dodatnog obrazloženja od strane predlagača. Učesnik u diskusiji je Vehid Osmanović i iznio je sljedeće:

„Klub vijećnika SDP-a pozdravlja hrabrost predlagača da se umjesto 80 za narednu školsku godinu broj stipendija poveća na 84. Zaista u ovako teškoj ekonomskoj situaciji povećanje je jedna hrabrost, a i ohrabrenje za mlade da im dajemo veću podršku.“

Nakon toga Odluka o broju i visini stipendija za učenike srednjih škola i studente za školsku 2013/2014. godinu usvojena je jednoglasno sa 27 glasova „ZA“.

TAČKA 2:

ODLUKA O UTVRĐIVANJU USLOVA, KRITERIJA I POSTUPKA DODJELE STIPENDIJA UČENICIMA SREDNJIH ŠKOLA I STUDENTIMA

Hasan Fehratović je iznio stav Komisije za propise i Statut:

„Razmatrana je ova odluka i u toku razmatranja odluke uočeno je da u prijedlogu Odluke nema kriterija, odnosno ne boduje se uspjeh sa odgovarajućih takmičenja, općinskih, kantonalnih itd. Kako smo predlagača mogli da razumijemo, bilo je određenih komplikacija prilikom bodovanja. Mi predlažemo da se ponovno boduju uspjesi sa takmičenja općinskih, kantonalnih itd., a naravno za prethodnu školsku godinu. Jer prema informacijama koje nam je gospođa Senaida kazala učenici i studenti su te diplome za takmičenja koristili u više školskih godina. I učenik generacije koristi diplomu za stipendiju ali samo za prethodnu školsku godinu. Mi predlažemo da se vrati taj kriterij uspjeha na određenim takmičenjima i to kod nastavnih takmičenja i da se to može naravno upotrijebiti u toku jedne školske godine. Ako se znači u ovom trenutku vrši bodovanje, da se diplome predaju iz prethodne školske godine. Pretpostavljam da će predlagač to ugraditi i da se zna koji član, koja tačka itd. Takođe jedan od članova Komisije je predložio da se u kriterije uvrste i studenti generacije. Ovdje se misli po ovom novom bolonjskom procesu studija tri plus dva. Prije je to bilo postdiplomski studij, a kako sam razumio sad to ide master studij i oni su i dalje redovni studenti četvrte i pete godine, pa ukoliko imamo i studenata generacije sa područja naše općine, a koji su nastavili i dalje ostali redovni studenti, da se i ti studenti na adekvatan način boduju.“

Za riječ se javila Senaida Šaković, šef Službe za upravu i u ime predlagača naglasila:

„Što se tiče ovih primjedbi predlagač je sve prihvatio i ja sam pokušala da to ugradim kako bi vam bilo lakše za usvajanje. Sada ću vam reći u kojem je to članu i kako bi glasilo to što je Komisija predložila. U članu 5. Odluke gdje se govori o svim kriterijima koji se boduju pod brojem 6. bio bi uspjeh na takmičenjima, znači poslije opšteg uspjeha u prethodnom školovanju. Zatim u članu 10. posljednji stav dodao bi se i glasilo: - Za studente 4. i 5. godine studija po bolonjskom procesu obrazovanja koji su nakon završene treće ili četvrte godine studija, zavisno od toga da li se radi o studiju 3+2 ili 4+1, bili studenti generacije, utvrđuje se 5 bodova. Zatim da se doda jedan član koji bi glasilo: - Uspjeh učenika i studenta kao pojedinca na takmičenjima iz pojedinih nastavnih aktivnosti iz prethodne školske godine boduju se kako slijedi, pa sve ono što smo imali prošle godine. Na državnim takmičenjima, prvo mjesto, drugo mjesto, treće mjesto. Prvo 80, drugo 70, treće 60 bodova. Zatim, na federalnim takmičenjima, prvo mjesto 60, drugo 50 i treće 40 bodova. Na kantonalnom takmičenju, prvo mjesto 40, drugo 30 i treće mjesto 20 bodova. Na općinskom takmičenju prvo mjesto 20, drugo mjesto 10 i treće mjesto 5 bodova. Ako isti kandidat ostvari bodove po više osnova iz stava 1. ovog člana, oni se ne mogu zbrajati nego se uzmu bodovi stečeni samo po jednoj osnovi i to najpovoljnijoj osnovi. To smo isto uradili i u članu 12. dodali znači uspjeh na takmičenju kao kriterij. Ovo za studente 4. i 5. godine, studente generacije, novi član i znači kod svake kategorije od ovih naprijed pobrojanih pet kategorija za koje se dodjeljuju stipendije. To je to.“

Učesnici u diskusiji su:

Rahim Gadžić:

„Klub vijećnika SDA je razmatrao Odluku o utvrđivanju uslova, kriterija i postupka dodjele stipendija studentima i učenicima srednjih škola. Pošto Odluka nije bila na javnoj raspravi mi danas

ulažemo amandman na ovu odluku u sljedećim članovima. U članu 6. kod kriterija, vrijeme provedeno u OS R BiH boduje se tako što se za svaku godinu učešća u OS utvrđuje po 10 bodova kako slijedi. Klub SDA smatra da je ovo malo u bodovima i predlažemo da stoji, za jednu godinu 20 bodova, za dvije godine 40 bodova, za tri godine 60 i za četiri godine provedene u OS 80 bodova. Zatim, u članu 7. je vjerovatno greška jer stoji za dobitnike ratnih priznanja i odlikovanja utvrđuje se 3 boda jer je nelogično i treba da stoji sigurno 30 bodova, što mi i tražimo. Zatim u članu 8. stepen invaliditeta RVI boduje se kako slijedi. Invaliditet 50% do 60% boduje se sa 10 bodova i mi smatramo da je to malo i tu treba da bude 20 bodova, od 60% do 80% 40 bodova, od 80% do 90% 60 bodova i za invaliditet od 90% do 100% da bude 80 bodova. U članu 9 gdje stoji, ako učenik nema oba roditelja 40 bodova, mi smatramo da tu treba da stoji 80 bodova, a ako kandidat nema jednog roditelja da to bude 40 bodova. U članu 10 gdje je u pitanju prosječna ocjena ima greška pa da se ispravi. Tražim da se Vijeće izjasni o našim amandmanima.“

Senaida Šaković:

„U ime predlagača prihvatamo sve prijedloge i ugradit ćemo ih u Odluku.“

Vehid Osmanović:

„Ja bih samo Senku zamolio da malo pojasni, jer meni i kolegama nije jasno da student generacije dobije 5 bodova, jeste li tako rekli u članu 10. Mislim da student generacije treba automatski dobiti stipendiju. Ako učenik generacij dobija automatski, onda i student generacije bi trebao. To je moje mišljenje pa da vidimo. Pet bodova je ništa u odnosu na ove gore bodove koji su sad 50, 80 i slično.“

Senaida Šaković:

„Odlukom o broju i visini stipendija smo utvrdili 14 stipendija za učenike generacije. Mi smo razmišljali da to uradimo i za studente generacije, međutim mi ne znamo koliko fakulteta to dodjeljuje, koji su to fakulteti u BiH. Nismo znali tačan broj tih stipendija. Zbog toga smo išli na ovu varijantu, a vi možete reći da je to i 20 i 30, jer su rekli, dajte bilo šta. Tako da smo mi to predložili.“

Vehid Osmanović:

„Ja to ne bih uopšte ograničavao sa brojem studenata. Kamo sreće da Gračanica dobije 100 studenata generacije što je nemoguće. Ako mi iz svoje sredine imamo takvih koji će biti student generacije, pa njemu i treba dati ta sredstva odmah, a ne da to bude mjesečno po 100, odnosno 120,00 KM. Ja sam zagovornik da svaki student generacije dobije, jer je on jedan u kategoriji studija. Mi smo prošle godine, koliko znam, imali samo dvoje iz Gračanice.“

Dino Dedić:

„Klub LDS i Naša stranka neće podržati amandmane od strane SDA prvenstveno zbog toga što smatramo da ovako dodjeljivanje stipendija više ide za status nego za učenje. Učenje je stavljeno u drugi plan. Slažemo se sa Vehidom da najbolji učenik i student generacije treba da dobije odmah stipendiju i to znači bez ikakvih kriterija. I još nešto, samo da mi pojasnite kad ste govorili za master studije 3+2. Ako je student generacije na fakultetu i ako ima prosjek 9 i više, idu na stipendije federalnog nivoa koje su i veće i do 5.000,00, tako da mislim ova stipendija mu neće biti u interesu, a imamo i kantonalne koje iznose 2.500,00 KM.“

Sead Gazibegović:

„Nešto mi je palo u oči. Naime, ima ovdje i ovaj član za deficitarna zanimanja i stipendije. Mi znamo kako stvari stoje. Normalno načelnik donosi odluku, ali možda ćemo doći u situaciju da jednostavno kažemo, nema deficitarnih zanimanja. Da li odluka treba da definiše to, šta u tom slučaju sa stipendijama. Da li se neće dodijeliti ili se raspoređuju po nekom ključu, ili ih neće biti deset, bit će ih samo pet.“

Rahim Gadžić:

„Vjerovatno kolega Dino nije možda do kraja iščitao ili nas nije shvatio šta smo mi kazali. Učenik sa prosječnom ocjenom 4,5 do 5,00 boduje se sa 180 bodova, a trenutno su najugroženije

kategorije RVI i demobilisani borci, a za njegovu godinu dana provedenu u borbi dobija 10 bodova. Ipak znači treba cijeliti te ljude koji su bili ovdje. Za učenike generacije su stipendije obezbijeđene. Oni ne ulaze u kategoriju bodovanja uopšte. A evo vidimo danas da i studenti generacije dolaze u kriterije. Studenti čiji je prosjek od 9-10 boduje se sa 200 bodova i kako bi drugi iz svih kategorija mogli dostići ovo ako se ne budu sa više bodova. Ovim nije znanje ugorženo, a i predlađač je to prepoznao, tako da pomognemo najugroženijim kategorijama da i oni dobiju stipendije. Mi smatramo da je ovo potpuno ispravan put i da se znanje ne umanjuje.“

Općinski načelnik:

„Evo da probamo izaći iz ove, da kažem dobre situacije. Svi su prijedlozi zaista bili dobri. Mi smo i do sada imali takvih slučajeva. Može se desiti da nemamo ni u jednoj kategoriji dovoljno. Mi smo to do sada rješavali, a evo mažemo i odlukom to definisati, da se izvrši raspodjela onim gdje su sa jednakim brojem bodova. Desi nam se da po deset kandidata ima jednak broj bodova, pa da se takva jedna odredba ugradi. To jest, da ako se desi da ima manji broj kandidata u jednoj kategoriji, da se dodijeli stipendija kandidatu iz druge kategorije, ako ima isti broj bodova. Studenti generacije, to je malo specifično. Može se desiti da imamo stotinu. Jedan fakultet izabere, drugi ne i ako bude takvih riješit ćemo i njih. Neće biti problem za to.“

Predsjedavajući Vijeća je dao Odluku na izjašnjavanje.

Odluka o utvrđivanju uslova, kriterija i postupka dodjele stipendija učenicima srednjih škola i studentima je usvojena sa 2 glasa „SUZDRŽANO“ i 25 glasova „ZA“.

TAČKA 3:

ODLUKA O PROMJENI STATUSA NEPOKRETNOSTI U OPŠTOJ UPOTREBI

Nije bilo učesnika u diskusiji i Odluka o promjeni statusa nepokretnosti u opštoj upotrebi je usvojena jednoglasno sa 27 glasova „ZA“.

TAČKA 4:

IMENOVANJE POPISNE KOMISIJE OPĆINE GRAČANICA ZA POPIS STANOVNIŠTVA, DOMAĆINSTAVA I STANOVA U BiH 2013. GODINE

U diskusiji po ovoj tački dnevnog reda učestvovali su:

Edin Ibrišević:

„Predlažem Općinskom vijeću da u članu 1. pod rednim brojem 5. umjesto Okić Zajim imenovano lice, član, stavi Pindžić Admir.“

Rahim Gadžić:

„Prvo pitanje gospodinu predsjedavajućem. Zbog čega se nije ispoštovao rok do 21. 06. za imenovanje popisne komisije? Na vijestima se čuje da to nisu uradile neke općine i među tim općinama je i Općina Gračanica. Zbog čega se nije ispoštovala ta procedura? Zatim, evo da vidimo da nećemo slučajno napraviti neku grešku. Ovdje stoji, na osnovu Rješenja Općinskog načelnika o imenovanju Konkursne komisije za provođenje konkursne procedure za izbor članova popisne komisije za općinu Gračanica. Međutim, po ovom aktu o dopunama procedure za izbor popisnih organa i osoblja koje će biti angažovano na popisu stanovništva, domaćinstava i stanova u BiH 2013. godine, pod rednim brojem 11, povlaka 43, povlaka 2, povlaka 12, povlaka 798, povlaka 4/13 stoji. Nadležna općinska komisija u saradnji sa predsjedavajućim Općinskog vijeća, načelnikom i vijećnicima iz drugih naroda može da imenuje članove konkursne komisije. Pitam, je li ovo sve ispoštovano, na osnovu imenovanja te konkursne komisije. Ako jeste, znači rješenje je u redu, a ako nije zbog čega se nije imenovalo. Zatim, kad je u pitanju prijava, gdje se nalazio konkurs za prijavu. Evo ovdje imamo prijedlog i rang listu za popisnu komisiju Općine Gračanica, gdje je bio oglašen taj

konkurs kad znamo da vjerovatno mnogi stanovnici koji su željeli da se prijave nisu bili obaviješteni oko ovog konkursa. Zašto se nije, jer smo i na nekoliko prošlih sjednica raspravljali kad je vezano za konkurse da se oglasi u svakoj MZ-i koje imaju svoje oglasne ploče, da bi svi građani koji su zainteresovani mogli se prijaviti na konkurs. Vidimo, a evo i ja nisam upoznat i većina njih nije bila upoznata oko ovog konkursa. Zbog čega se nije ispoštovalo u proceduri da i mi budemo obaviješteni i svaka lokalna samouprava, znači svaka MZ-a da bude upoznata oko konkursa. Nemamo ništa protiv ovih ljudi koji su ovdje i nadamo se da su i u popisnoj komisiji izabrani najbolji stručnjaci koji će obaviti posao savjesno, odgovorno, ali da li je u samom postupku narušena procedura. Da li je ovo sve ispoštovano. I u narednoj proceduri kada se raspiše konkurs za instruktore i popisivače da se oglasi i u svim MZ-a na oglasnim pločama i da budu kriteriji za bodovanja da oni građani koji ispunjavaju uslove da se mogu prijaviti. Ne živi svako u Gračanici, neko je daleko deset i petnaest kilometara i neće moći u roku od 4 dana doći i pogledati na oglasnu ploču da je konkurs otvoren. Zato i tražimo da u svim MZ-a bude na oglasnim pločama konkurs za instruktore i popisivače.“

Hasan Puškar:

„Imam jedno pitanje. Znam kako se postaje ostali, nakon popisa. Kako je Okić Zaim postao ostali, musliman ili Bošnjak. Na osnovu čega je postao ostali i da se svrsta u komisiju?“

Općinski načelnik, Nusret Helić:

„To ostali, izjava je dovoljna tad, jer po ovim svim pravilima izjava je da se izjasni. Nama je bilo malo čudno ali evo sad ćemo vam objasniti. Ovo što Gadžić iznese. Tako je ekspresno ovo rađeno da smo mi imali četiri dana od toga kad su došli odozgo zahtjevi prema nama da imenujemo komisiju, pa da komisija provede do ovog roka kojeg je trebalo, 25. 06. Bilo je raznih tumačenja, od toga da može komisiju imenovati načelnik i došli su takvi urneci rješenja. A kasnije ispravke da imenuje Općinsko vijeće. Da bi završili poslove imenovao je načelnik komisiju od stručnih ljudi da provede procedure. Tamo su nam u uputstvima rekli, dovoljno je objaviti na oglasnoj tabli. Imali smo četiri dana ili pet za konkurs. Mi smo rekli dajte na Radio Gračanici i dajte na našu web stranicu. Evo i da smo imali više vremena što u svim MZ-a, jer jedan Bošnjak može biti samo u komisiji. Bošnjak, Srbin, Hrvat, ostali i mora neko iz katastra. To su pravila. Iz katastra dakle mora biti, prijavio se ili ne prijavio. I mislim da nismo ništa fulili u procedurama. Mislim da smo prije završili nego mnogi drugi. Ovo što čujete pomjeren je rok. Pomjeren je jer su ljudi bili u dilemi. Kod nekih se u komisiju nije prijavio ni Hrvat ni Bošnjak, kako ga imenovati. Mi smo rekli i mislim da smo u pravu, mora se naći i ako se i ne prijavi. I neki će i tako raditi. Moraju otići po njega u neku MZ-u ili u neku drugu općinu. Ne može proći bez toga. Obavili smo procedure i što se tiče ovog prijedloga, izjasnio se čovjek kao ostali, a prevagnulo je, volonter je u Općini pa će lakše raditi. A i ja sad mislim, predložiti ćemo i prihvatiti da to bude ovaj Rom, jer ima isti broj bodova, Pindžić. Prihvatamo i imat ćemo sve predstavnike i stručni su. Oni će imati puno posla, a i u izboru instruktora i popisivača se mora mnogo ispoštovati.“

Rahim Gadžić:

„Pošto je predsjednica komisije tu prisutna, zanima me ovo kad je vršeno bodovanje, ovo opšti dojam o kandidatu. Šta se pod tim podrazumijeva. Kakva su bila pitanja da bi se ocijenio opšti dojam kandidata?“

Senaida Šaković:

„Mi nismo imali nikakva posebna uputstva, ali smo morali obaviti taj dio posla. Mi smo kroz intervju, svaki od kandidata je bio pred komisijom i razgovarali smo s njima. Jedno opšte pitanje je šta ih je opredijelilo da se jave na konkurs i oglas i imaju li iskustva na tim ili sličnim poslovima. To smo obavili bez nekog uputstva. Svi su bili dobri, ali su najviše dobili bodova kandidati iz organa uprave jer je i u proceduri tako. Ostale sve smo uputili da se jave na oglas za instruktore i popisivače.“

Prešlo se na izjašnjavanje.

Prijedlog Edina Ibriševića da umjesto Okić Zaima bude Pindžić Admir, usvojen je jednoglasno.

Konačno rješenje o formiranju Popisne komisije općine Gračanica za popis stanovništva, domaćinstava i stanova u BiH 2013. godine usvojeno je jednoglasno sa 26 glasova „ZA“.

Kratko je sjednicu napustila Esma Pašić.

Data je pauza u trajanju od petnaest minuta.

Nastavku sjednice prisustvovalo je 27 članova Vijeća. I dalje su odsutni Hasić Mujo, Omerdić Mirza i Tursunović Esad.

TAČKA 5:

INFORMACIJA O INSPEKCIJSKOM NADZORU IZ OBLASTI RADNIH ODNOSA SA BROJEM PREGLEDA I PODUZETIM MJERAMA KOD PRAVNIH I FIZIČKIH LICA NA PODRUČJU OPĆINE GRAČANICA U 2012. GODINI

Učesnici u diskusiji su:

Fadil Mešić:

„U ovoj informaciji od Kantonalne uprave za inspekcije stoji da su ukupno u 2012. godini na području općine Gračanica izvršili 123 nadzora, od čega 964 zakonito, pa onda 873 zaposlenika zakonito, 91 je zatečeno nezakonito, pa opet nakon ukazivanja da su po nalogu postupajućeg inspektora kao zaključili ugovore. Znači ispadne da je samo 52 radnika nezakonito zatečeno na području općine Gračanica, što je u odnosu na stanje na terenu smiješno. Priznali mi to ili ne, to je tako. Ovakve inspeksijske kontorle u dosadašnjem radu nisu dale rezultate, iako ovamo u tabelama prikazom se vidi da su ponešto radili. Veliki broj radnika na općini i cijelom kantonu radi na crno. Mi to dobro znamo, i vi, tako da u ove cifre teško da ko može da povjeruje. Ja tvrdim da na općini Gračanica ima preko hiljadu radnika angažovanih bez ikakvih prava, bez sindikalnog uvezivanja tako da ove kratkoročne inspeksijske kontrole zaista nisu dale nikakve rezultate. Još ako se dolazi do podataka da su inspeksijske kontrole u sprezi sa određenim poslodavcima, još je više poražavajuća situacija u tom dijelu. Tako da ovaj izvještaj, mislim ne treba prihvatiti, treba ga ponovo vratiti i da nedostaje stvarni izvještaj na terenu. Da se inspektori uhvate u koštac sa ovom pojavom koja već evo poslije završetka rata na području cijele BiH zahvata maha, tako da nam i fondovi ostaju uskraćeni, imamo nestabilni PIO. U ovom slučaju neću moći prihvatiti ovaj izvještaj i bit ću protiv.“

Vehid Osmanović:

„Meni je lično drago da smo mi jedanput dobili ovakvu informaciju i bilo bi dobro da se ne upućuju vijećnička pitanja, nego da mi ovakve i slične imamo svake godine na razmatranju na Općinskom vijeću. Pošto ovdje postoji gospođa iz inspeksijskih organa, ja ću kao privrednik nešto reći vezano za ovu informaciju. Ova je informacija skup podataka pregledanih pravnih i fizičkih lica koja su registrovana. Međutim, mi imamo dvije kategorije rada i radnika na crno. Prva kategorija su oni koji su praktično u privrednim subjektima i kod nekih fizičkih lica ongažovani i nisu prijavljeni ni na penzijsko ni zdravstveno osiguranje, ali takođe imamo jednu veću kategoriju ljudi koji rade na crno, a nisu vezani ni za jedan privredni subjekat, znači nisu ni za što registovani. Prije svega to se najviše odnosi na oblast građevinarstva gdje ljudi masovno rade, zidaju kuće, stambene objekte, štale itd., a praktično nisu prijavljeni nigdje. Zakonom oni nikako nisu tretirani. Njima inspekcija rada ne može ništa. Oni jednostavno rade na crno bez mogućnosti bilo kakvih sankcija. I druga stvar, ove sankcije koje su predviđene za pronalaženje radnika na crno kod privrednih subjekata su katastrofalno niske. S obzirom na visoke poreze i doprinose koji opterećuju svakog regularno registrovanog radnika neki privredni subjekti su primorani da nalaze razne mogućnosti, a ja nisam pobornik da ta mogućnost bude da se radi na crno. Treba voditi računa da se svi porezi i doprinosi smanje, a da se kazne povećaju. Da kazna, evo na jednog radnika na crno minimalno bude 10.000,00 KM, a za svako povećanje da to bude dodatnih 5.000,00 KM. Mislim da to nije do inspekcije i da ona ne može, jer ona koristi postojeće zakonske okvire ali trebamo možda odavde iz ovog općinskog vijeća pokrenuti inicijativu da se zakonska regulativa mijenja, da se povećaju kazne za rad na crno ali da se pokrene inicijativa, a već je preko nekih organa to i pokrenuto da se ti porezi i doprinosi na plate smanje, a svakako i ovaj minimalac koji je sada trenutno, treba da se poveća. Treba izuzeti neke nisko akumulativne grane koje

možda ne mogu, ali minimalac od 1,95 KM niko živ ne isplaćuje, isplaćuju ga na neki drugi način, gdje ponovo umanjuje poreze i doprinose državi. Znači, dobro je imati jednu ovakvu informaciju. Ona nam govori da otprilike kod subjekata ima jedna velika količina tih ljudi, tako da i ovaj procenat od 7% je ogroman broj iako je taj broj svakako veći. Hvala na informaciji jer smo imali priliku da bar vidimo neke podatke ali treba ovo rješavati na jedan puno, puno bolji način.“

Safet Pjanić:

„Stranka BPS će podržati ovu informaciju uz par napomena i sugestija. Ja ću isto kao privrednik reći par stvari kad je u pitanju ova siva ekonomija i rad na crno. Pošto sam ja iz Udruženja tekstila i obuće na nivou BiH, mi se borimo za smanjenje doprinosa na plate radnika. Međutim, veliki problem predstavljaju i ovakvi slučajevi rada na crno, a znamo svi o čemu se radi. Po meni nema lopova privatnika, ima država nesposobna, koja ima sve instramente u svojim rukama i mislim da ona to može da riješi. Svima je stalo da šta više učabuljimo na crno, da ne platimo jer je svakom najskuplji radnik. Plata je najveći trošak u poslovanju. Ja znam iz iskustva da npr. dođem u ugostiteljski objekat, radi gazda i šef sale i pitam šta je, a odgovor je, dolazi inspekcija. Ja bih zamolio pristunu gospođu da metodom iskustva na poslovima zna koliko ko upošljava na crno jer se događa kad su pregledi inspekcije, neko dojavu i tamo gdje se piju kafe na jednom mjestu, a samo radi gazde u firmi. Nemojte dozvoliti da se događaju takve stvari jer je Fortuni skoro sanitarna inspekcija izrekla kaznu od 10.000,00 KM i kažu da je to minimalna kazna. Ovo je samo jedna sugestija da siva ekonomija i rad na crno hara ovom zemljom, a da vi inspektori znate ko to i kako radi i ne treba vam policija da dolazi u Fortunu sa sanitarnim inspektorom. Uzmite policiju i otidite u jedan ugostiteljski objekat i vidjet ćete koliko imaju radnika na crno. Ja imam 1300 radnika i svi su prijavljeni i muku mičim sa doprinosima jer je zaista to armija, vojska, a drugi voze džipove. I ja bih vozio džipa kad bih samo 200 ljudi godinu odjavio. Podržavam ovaj izvještaj i čestitam vam na radu i dajte da, što je moguće više bude nadzora jer mjesta za pretres inspekcije ima.“

Odgovore na pitanja i sugestije dala je Ljubica Petrović, predstavnik Kantonarne uprave za inspeksijske poslove, naglašavajući da s malo inspektora uprava puno radi uz lošu zakonsku regulativu.

Nakon toga, Informacija o inspeksijskom nadzoru iz oblasti radnih odnosa sa brojem pregleda i poduzetim mjerama kod pravnih i fizičkih lica na području općine Gračanica u 2012. godini, usvojena je sa 25 glasova „ZA“ i 1 „PROTIV“.

Prisutno je bilo 26 članova Vijeća jer je kratko sjednicu napustio Puškar Hasan.

TAČKA 6:

PROGRAM KAPITALNIH INVESTICIJA OPĆINE GRAČANICA ZA PERIOD
2010.- 2014.GODINA - AŽURIRANJE U 2013. GODINI

Nije bilo učesnika u diskusiji i Program kapitalnih investicija Općine Gračanica za period 2010.-2014. godina - Ažuriranje u 2013. godini usvojen je jednoglasno sa 26 glasova „ZA“.

TAČKA 7:

IZVJEŠTAJ O REALIZACIJI PROGRAMA KAPITALNIH INVESTICIJA OPĆINE
GRAČANICA U 2012. GOD.

Nije bilo učesnika u diskusiji i Izvještaj o realizaciji Programa kapitalnih investicija Općine Gračanica u 2012. godini usvojen je jednoglasno sa 26 glasova „ZA“.

TAČKA 8:

INFORMACIJA O STATUSU PROJEKTA „POBOLJŠANJE SISTEMA VODOSNABDIJEVANJA I PROŠIRENJA SISTEMA KANALIZACIONE MREŽE NA PODRUČJU OPĆINE GRAČANICA“ KANDIDOVANOG PRI EVROPSKOJ INVESTICIONOJ BANCI (EIB)

Nije bilo učesnika u diskusiji i Informacija o statusu Projekta „Poboljšanje sistema vodosnabdijevanja i proširenja sistema kanalizacione mreže na području općine Gračanica“ kandidovanog pri Evropskoj Investicionoj Banci (EIB) usvojena je jednoglasno sa 26 glasova „ZA“.

TAČKA 9:

RJEŠENJA I ZAKLJUČCI IMOVINSKO-PRAVNE SLUŽBE

Rješenja i zaključci Imovinsko-pravne službe usovjena su jednoglasno, bez učesnika u diskusiji, sa 27 glasova „ZA“ jer se na sjednicu vratio Puškar Hasan.

Sjednica je završena 11.55 sati.

Zapisnik vodila: Mevlida Naimkadić
Tonski snimak sjednice uredno je arhiviran.

Mevlida Naimkadić

PREDSJEDAVAJUĆI
OPĆINSKOG VIJEĆA

mr.sci. Edin Ibrišević